

Item es haben auch die rete vff den tag denselben, die do braw vnd maltzhuser haben, ir braw vnd melezlon gebessert nach deme sie von rate begert vnd gebeten haben vnd haben in zeugesagt vnd erlewbt, das ein meltzer von eyne maltze XL gute gr. nemen sall vnd mag vnd ein brawer von seinem brawhuß XVI gr., vff das sie ire brawe vnnde meltzhuser desterbaß erhalten mogen vnd nicht zeugehen ader wuste stehn lassen dorffen; doch stet diß biß widderruffen vnd vorandern der rete, wenne es die zzeit gebe, das sie mynner nemen konten, das mans auch tete vnd gescheen ließe. Actum die et anno quo supra.

Nach dem Rathsbuch fol. 72^b im Archiv des K. Bezirksgerichts zu Leipzig.

No. 436. 1469. 23. Sept.

Der Rath bestätigt die Handwerksartikel der Holzschuhmacher.

Vff hewt sonnabent nach Mathaei apostoli anno 20. LXIX sint die meister vom hantwerke der holtzschuer vor den rath komen vnd desse nachgeschriben punct vnd artickel zcubestetigen gebeten, die danne die rete mit vleis obirsehen, eygentlich gemerckt vnde dem egnanten hantwerke also bestetigt haben, dieweil sie nicht vnphilichs darinne finden noch verstehen, vnd wohn das sie vom hantwerke vestiglich gehalten werden sollen.

Zcum ersten sall eins meisters son sein vol hantwerk vngewonnen haben, das arbeiten vnd geprauch, so fern ab er des hantwerges ist, vnnde eyns meisters tochter die helffte. Auch so sollen die iungsten zewene meister der kertzen warten vnd keyner des vertragen ader vßgeschlossen sein bei VI pfennigen, so oft er das vorsewmen wurde. Item eine fraw noch tode ires mannes sall ir vol hantwerk haben vnd mit gesinde halden vnd arbeiten solange biß das sie widder zcu eelichem stande vnd leben kome. Item es sall kein meister mehr danne zewene knechte vff dem hantwerke halden, hat er aber einen lehriungen, so sall er zcu dem iungen eynen knecht vnd nicht zewene haben vnd halden bei II pfunden wachs, so oft es geschee. Item es sall kein meister keynen iungen zculernen anders danne vff zewei iar vffnemen, so sall auch ein itzlicher leriunge zwey iar lernen vnd den meistern II pfunt wachs zcu den kertzen geben; ouch sall nymant keynen vneelichen leren. Item es sall auch nymant meister werden, er habe denne zewei iar nochenander vngeteilt bei eynem meister gelart; item so sall keyner fur einen gesellen dynen noch erbeitten, er habe denne zwey iar ußgelernet. Item wer meister werden will vnd nicht bewibet ist, der sall das hantwerk in eynem iare drey wchfasten nach enander von den meistern muten, so danne sal mans im reichen; ist er aber bewibet, so sal mans im zeustunt zcu der ersten mutunge reichen vnd in darzcu vffnemen. Item wer danne also meister werden wil, der sal sein hantwergk nach gewonheit bewiesen; wert er danne des hantwerges tuchtig erkant, als danne sal er geben XX gute gr. in die buchsse vnd, den meistern III pfunt wachs vnd darneben den meistern XV gr. zcu er collacien.